



Aqqalu C. Jerimiassen  
Atassut

UKA 2021/46  
27. oktober 2021

**Ukiut qulit ingerlaneranni ilinniarfinni Ilisimatusarfimmilu ilinniartitsisut ikinnerpaamik 80 %-iisa kalaallisut ilinniartitsisalernissaat anguniarlugu periarfissat suunerinik Naalakkersuisut misissuinissaat pillugu Inatsisartunut aalajangiiffigisassatut siunnersuut. Misissuineq UKA2022-mi saqqummiunneqassaaq.**

(Inatsisartunut ilaasortaq Doris J. Jensen, Siumut)

Tamatta isummersorsinnaatitaavugut. Aamma isummat tamalaat inissaqartinneqarsinnaajuaannartariaqarput. Unali siunnersuut atuarlugu assorsuaq tupigusuummernarpoq.

Siunnersuuteqartup tunngavilersuutigivaa kalaallisuinnaq oqaluttut ilinniaqqinnissaminut periarfissaqarluartariaqartut. Tamanna assortorumaappoq. Ajoraluartumilli tusartarpalput angajoqqaat meeqqatik oqarfigisaraat kalaaliugamik kalaallisut oqalukkunik naammattoq. Killilfersuineq najoqqutaralugu ilinniartitaaneq ilusilersorniarparput?

Ilinniakkami qaffasinnerni, pingaartumillu akademiskiusuni atuagassat amerlasoorujussuupput, semesterimut tusindilikkaat, atuagarpassuit ukiut tamangajaasa ilisimasat nutarsartuartillugit taarserneqartuartartut. Piviusorsiornerpa ukiumut atuagarpalujorujussuit nutsertittalernissaat? Ilinniakkanut ataasiakkaanut ajussagunangilaq, taakkulu oqaloqataaffigikuttoorsinnaavagut. Ilinniakkanulli akademiskiunerusunut tulluanngilluinnarpoq.

Nunarsuatsinni qaffasissumik ilinniagaqarnermi tuluit oqaasii atorneqartarput, allaat aamma Danmarkimi qaffasissumik ilinniarneq tuluttut ingerlanneqartarpoq.

Piviusorsiornerpa piginnaasaq appasinnerpaaq naapertorlugu qaffasinnerpaami ilinniartitseriaaserput ilusilersussallugu? Atassummiit suleqataalluarusuppugut ilinniartitaanikkut qaffassaanissamut, pisinnaanngorsaanissamut. Peqataarusuppugut oqaatsit amerlanerpaat ilinniarneqarsinnaanissaannut. Angajoqqaatullu meeqqagut oqaatsinik ilinniarluarnissaannut kaammattuiartariaqarpugut.

Siunnersuuteqartup siunertarisaa paasinraluartoq, allannguiniarnera naapertuutinngilluinnarpoq. Ullutsinni aatsaat taamak pisariaqartigilerpoq oqaatsinik ilinniarluarnissaamut. Kalaallisut oqaatsigut pilliutigiunnangilagut oqaatsinik nutaanik ilinniarutta.

Meerartagummi iPad-ersorput, youtuber-put, netflixerlutilu. Malunnarporlu taakku atorlugit oqaatsinik ilikkapallassinnaasut. Qitornagut meeraanerannit, angerlarsimaffimmi, atuarfimmilu atortorissaarutit atorluarlugit kaammattortuartigit oqaatsinik nutaanik ilikkagaqarnissaat. Taamaalillutik siunissami sumiluunniit ilinniaqqinnissaminut aporfiusinnaasut

annikinnerujussuanngussagaluarput. Oqaloqataarusupugut. Siunnersuulli taamatut isikkoqartillugu apeqquserparput.

